



Gemeinsam Äntwert vum Här Inneminister a vum Här Finanzminister op d'parlamentaresch Fro n°2015 vum 5. Mäerz 2025 vum honorabelen Députéierten Sven Clement zum Sujet "Augmentation des saisies de drogues"

Fro 1: Wéi vill Drogen (no Gewiicht/Volummen a Wäert) sinn an de leschte 5 Joer zu Lëtzebuerg saiséiert ginn, opgeschlëselt no Joer a Substanz?

Den Tableau hei drënner schlësset d'Saisie vun den heefechsten Drogen¹ vun de leschte 5 Joer no Quantitéit a Substanz op. De Verkafspräis ass staark ofhängeg vun der Qualitéit vum Produkt um Marché a gëtt vun den Dealer festgeluecht, esou dass keng genee Ausso zum Wäert vun de Saisie vun der Police oder der Douanesverwaltung gemaach ka ginn.

Drogen déi vun der Police saiséiert gi sinn:

	Heroin	Kokain	Haschisch	Marihuana
2020	1088g	9580g	3510g	83803g
2021	2213g	3665g	39263g	13993g
2022	5204g	1882g	15147g	58247g
2023	1064g	3024g	31852g	25947g
2024	1179g	1151g	23300g	18403g

Drogen déi vun der Douane saiséiert gi sinn:

	Heroin	Kokain	Haschisch	Marihuana
2020	387g	261g	143g	70491g
2021	544g	1785g	31847g	3743g
2022	1159g	738g	452g	169080g
2023	129g	145g	403080g	73760g
2024	23g	214g	1341g	26085g

¹ Aus Kohärenzgrënn a fir ee Verglach kënnen opzestellen, goufen an den zwee Tableaue vun der Police an der Douanesverwaltung déi selwecht Substanze representéiert. Dës si keng exhaustiv Lëscht vun alle Substanzen, mee déi heefegste Substanzen déi zu Lëtzebuerg saiséiert gi sinn vu béiden Administratiounen.



Fro 2 : Iwwer wéi eng Grenziwwergäng, Fluchhäfen, Postweeër oder aner Entréespunkten ass déi gréisste Quantitéit u Drogen an de leschte 5 Joer an eist Land komm?

D'Majoritéit vun den Drogen déi d'Police saiséiert gëtt iwwer d'Strooss iwwer déi klassesch Grenziwwergäng transportéiert.

D'Majoritéit vun den Drogen déi D'Douanesverwaltung saiséiert gëtt an der Loftfracht (inklusive Postpäck) transportéiert.

Dësen Ënnerschied läit natierlech un den ënnerschiddleche Missiounen vun den zwou Administratiounen.

Fro 3 : Aus wéi enge Länner/Regiounen staamt d'Majoritéit vun de saiséierten Drogen?

Lëtzebuerg bleift en Transitland. D'Police an d'Douane stelle fest, dass Drogen déi zu Lëtzebuerg ukommen allgemeng net fir Lëtzebuerg bestëmmt sinn, mä gréisstendeels just duerch Lëtzebuerg transitéieren.

De gréissten Deel vun den Drogen, déi am Stroossenhandel zu Lëtzebuerg saiséiert goufen, kommen aus Holland oder aus der Belsch op eisen Territoire. D'Majoritéit vun de saiséierten Drogen aus der Loftfracht kënt aus Drëttlänner.

Fro 4 : Wéi eng spezifesch Moossnamen huet d'Regierung ëmgesat, fir d'Sécherheetskontrollen am Cargo Center ze verbessern, nodeems dës massive Fund gemaach gouf?

Am Fall vun der ugeschwate Droge-Saisie gouf enk mat Europol zesumme geschafft.

Spezifesch Moossnamen kënnen keng vun der Police oder der Douane matgedeelt ginn.

Fro 5 : Ginn et Pläng fir eng international Task Force oder verstärkte Kooperatiounen mat aneren EU-Länner, fir géint Drogentransporter virzegoen?

Déi internal Policekooperatioun ass eng vu de Prioritéiten vun dëser Regierung a soll weider ausgebaut ginn, fir géint organiséiert Kriminalitéit an Droge virzegoen. Lëtzebuerg wäert ënnert anerem déi bestehend bilateral Kooperatiounsaccorden mat Däitschland a Frankräich aktualiséieren fir den aktuellen Erausforderungen gerecht ze ginn.

D'Police an d'Douanesverwaltung schaffen enk mat der Belsch, Holland a Frankräich zesummen, notament an de gemeinsame „Hazelton“-Operatiounen. An deem Kontext ginn all Joer e puer kontrolléiert Aktiounen mat aneren Member Staaten géint den Drogentransport duerchgeföhrt.

D'Douanesverwaltung bedeelegt sech och um nei gegrënnten *EU Customs Alliance for Borders Expert Team*, deen dës Joer lancéiert gouf. Dës Initiative viséiert d'Stärkung vun de gemeinsam operationelle Kapazitéiten vun den EU Douanesautoritéiten un all den EU Baussengrenz (Flughäfen, Häfen, Landesgrenzen) géint Drogenschmuggel an -handel.



Doriwwer eraus ginn an Zesummenaarbecht mat Europol reegelméisseg Informatiounen an Erfarungen ausgetosch. D'Police steet och an engem stännegen Austausch mat den Enquêteuren aus de Nopeschlänner, wat e quasi deeglechen Informationsfluss erméiglecht. Falls eng international Affär et hiergëtt, kann eng gemeinsam Ermittlungsekipp (Joint Investigation Team – JIT) agefouert ginn.

Souwuel d'Police wéi och d'Douanesverwaltung sinn an Aarbechtsgruppen um europäeschen Niveau vertrueden, wei zum Beispill de *Law Enforcement Working Party* vum Conseil de l'Europe. Lëtzebuerg participéiert als Land un der Prioritéit "trafic de stupéfiants" am Kader vum EMPACT (European Multidisciplinary Platform Against Criminal Threats).

Lëtzebuerg, vertrueden duerch d'Douane, mécht och bei der "Alliance européenne des ports" mat, fir déi de Kampf géint Drogentrafic eng Prioritéit ass.

Fro 6 : De selwechten Artikel am Wort geet dann och op d'Belsch an Holland an, wou et an de leschte Wochen a Méint zu massiver Gewalt tëscht Drogebande komm ass, duerch déi och onbedeelegt Persounen blesséiert goufen oder ëmkomm sinn. Zudeem wär säit 2021 bekannt, dass kolumbianesch Karteller antëscht och direkt an Europa aktiv wieren.

Wéi schätzt de Minister d'Gefor an, dass et an Zukunft och zu Lëtzebuerg zu esou gewalttätege Virfäll ka kommen?

Et gëtt aktuell keng Indikatioun, dass sech kolumbianesch Karteller zu Lëtzebuerg néiergelooss hätten. D'Police mécht eng kontinuierlech "évaluation de la menace" a suivéiert d'Tendenze vun der Kriminalitéit am Drogeberäich, notament duerch Kollaboratioun an Informationsaustausch mat den aner Memberlänner an zumools de Nopeschlänner.

De Risiko kann ni komplett ausgeschloss ginn, mee et ginn aktuell keng Indicien dofir, dass gewalttäteg Virfäll duerch Karteller zu Lëtzebuerg eng Gefor sinn.

Lëtzebuerg, den 14. Abrëll 2025
Den Inneminister
(s.) Léon GLODEN